

應教○領議政趙泰耆卒壽六十四 上下教曰新喪賢德震悼之懷曷可云
喻命該曹擇送棺板一部祿俸限三年仍給 親舉哀世弟亦舉哀泰耆故相
師錫子也稟資溫雅風儀端凝歷敷華顯致位卿班逮 上嗣服首膺甌卜當
羣陰盛極之會實負碩果之望及奮身叫閤轉危為安樹立卓然時望隆洽上
下方倚以為重而病已沉淹不能酬應衆務又無力量不能鎮壓浮囂特以崖
異於方生之論反為其忌嫉終至顛躓退屏于野議者惜之平居廉素不事產
業累領藩任家無尺寸之長但素性稍弱頗受干囑故當官無治聲云○憲府
掌令徐宗厦申前啓又論前正郎李重煥曾任金泉察訪時借人驛馬經年後還推
於凶逆之家事關鞫獄不可不問請拿問嚴覈得情金有慶尹廷舟等罪名至
重請還收量移之命廣興奉事柳晉禎本以孽臣之庶孽改其外祖之名書填
於試券締結勢家濫通仕籍請削去仕版 上只從李重煥柳晉禎事○甲寅
夜自一更至五更坤方巽方艮方有氣如火光○乙卯○丙辰 上幸大嬪私
廟崇品宗臣二貲入侍是 先朝展拜德興大院君祠宇時例也與其時事體
自別而宗簿寺援例為請無識甚矣大臣承旨以兩請停退 上不從○以金
重熙為司諫李德壽為輔德洪時九為忠清兵使○丁巳公山殺夫罪人順化